

LAAX



Casa e plaz duein animar alla sentupada.

VISUALISAZIUN ANDREAS SCHNELLER ARCHITECTURA

«Dapli ch'ina emprema badelada»

Las lavurs da spazzar il baghetg vegl dalla Sentupada ed allura da lantschar la construcziun dalla Nova Sentupada a Laax han entschiet. La gievgia encunter sera ei l'emprema badelada succedida. Il president dalla Pleiv catolica Laax, Christoph Kälin di: «L'emprema badelada ei dapli ch'entscheiver a baghegiar.» La primavera 2028 duei il baghetg niev esser prompts per sentupadas.

HANS HUONDER/FMR

SURSILVAN

Per in e scadin

Per remplazzar il baghetg vegl dalla Sentupada che ha prest 40 onns ha la Pleiv catolica Laax sbursau in credit da treis milliuns francs. Vid igl object niev separticipeschan la vischnauna politica da Laax e la Fundaziun Pro Laax cun mintgamai in milliun francs. La gievgia encunter sera ei l'emprema badelada pil baghetg niev succedida.

Stai envidai a quella ein representants dils investurs e dallas interpresas, la cumissiun preparatoria ed uniuns involvidas ella planisaziun sco era ils mistergners. Quels vegnan a spazzar e lu ad ereger la Nova Sentupada ils proxims strusch dus onns. «La primavera 2028 duess il baghetg niev star a disposiziun per siu intent sco liug da sentupada el ver senn dil plaid», di Christoph Kälin, president dalla Pleiv catolica Laax.

«Dall'idea alla realitad»

«L'emprema badelada ei dapli ch'entscheiver a baghegiar. Igl ei il mument che l'idea daventa realitad. Ord biars discurs ed ideas ein plans concrets naschi, ord giavischs crescha in liug nua che la gleud s'entaupa», di Christoph Kälin ch'ei president dalla pleiv dapi treis onns. La Sentupada veglia seigi stada 40 onns il liug per cantar e festivari; las uniuns e famiglias hagen giu leu in daccas. Secapescha che quei liug seigi era cumbinaus cun biasas regurdientschas persunalas. «El fratep ein las pretensiuns dalla societad semidadas. Ellas sedutas e discussiuns ei il cumprovau vegniu respectau ed il medem mument ei vegniu mirau cun curascha egl avegnir», di Christoph Kälin.

Center per differents intents

La Nova Sentupada a Laax daventa in center da sentupada cun localitads nezegiablas per differents intents. «La piazza avon il baghetg duei esser in liug da sentupada dil vitg», di il president dalla pleiv. Ch'il project seigi maduraus aschia che las lavurs sappien entscheiver secapeschi buca da sesez: «Nus havein giu biasas uras da lavur, discussiuns intensivas e lavurs da planisaziun. Tutta lavur ei vegnida fatga da carstgauns cun senn da responsabladad che han tratg tuts pil medem sughet», constatescha Christoph Kälin. Il baghetg futur vivi buca mo da veider, l'enn e betun, mobein dils carstgauns che visieten el. En in temps signaus dalla digitalisaziun seigien loghens da s'entupada per carstgauns da grond'importanza: «Nus investin en favur dallas uniuns, dallas famiglias e digl avegnir da Laax.»

La Nova Sentupada a Laax duei buca mo servir ad arranschaments dalla pleiv, mobein era a sentupadas d'uniuns dil vitg, persunas attempadas e giuvenils – seigi quei per emprovas ed occurrenzas ni per in scomi e per star da cumpignia. Las localitads san denton era vegnir reservadas per exempel per fiastas da famiglia, seminaris ni luvratoris.

Il cor dalla Nova Sentupada ei il plaz avon casa en fuorma da cuort che va currentamein

ella sala principala e che sa vegnir nezegiaus differentamein. «Il baghetg da l'enn levamein balantschau s'accorda harmonicamein cul crest-baselgia e dat in accent modern senza concurrenzar la baselgia sezza», constatescha la pleiv in siu pareri davart il project. El plaun sutterran sesanflan la sala pintga ed il local da giuventegna; el plaunterren la sala principala che sesarva a moda da pavigliun enviers il plaz e la cuschina; el plaun sura sesanflan duas stanzas da sesida.



L'emprema badelada ei fatga. Da sen.: Toni Camathias, president dalla Pro Laax, Severin Müller, mader da construcziun, Irina Beer-Killias, suprazonza communal, Andreas Schneller, architect, Manuel Montalta, Montalta SA, Christoph Kälin, president dalla pleiv, Cyril Casutt, Casutt Züger SA, Simona Camathias, menadra baghetgs ed infrastruttura dalla vischnauna, Marco Holderegger, Montalta SA e Markus Stoffel, suprazonza dalla pleiv.

FOTO MAD

SEDRUN

10avla ga Rock Sedrun



La band engiadinesa Reat dat la finiziun dil 10avel Rock Sedrun.

FOTO MAD

La 10avla ediziun da Rock Sedrun ha liug oz e sonda sigl areal sut il Bogn Sedrun. L'entschatta musicala fa la cover-band Friday Music Factory questa sera allas 19.30. Il program finescha cul cantadur e ghitarist Henrik Freischlader cun sia nova blues-rockband.

La sonda sera vala tier il Rock Sedrun sco «Sera Romontscha». Aviarra vegn quella digl Engiadines Gianni Tschennett. Cün sia band presenta el ses tocs da RnB, soul, hip-hop, blues e pop. Silsuetter suonda la cantadura ed artista Bibi Vaplan che lavura dapi il 2009 sco musicista libra. La finiziun dat lura in'ulteriura band engiadinesa, numnadamein Reat. Quella secumpona da treis amigs da giuventegna che fan ensem musica da punk-rock. Sco ils organisaturs communicheschan, ei l'entrada libra. (cdm/fmr)

GLION

Per la 31avla gada – Städtlifst Glion

La 31avla ediziun digl «Ilanzer Städtlifst» ha liug oz, venderdi, ils 7 e la sonda, ils 8 d'ost 2026. Il program entscheiva il questa sera allas 18.00 cun in cuors per affons dalla regiun e las Grischalortas. A las 18.15 vegn la presidenta dil comité d'organisaziun Claudia Bracher ed il president communal Marcus Beer a tener in plaid.

La sonda entscheiva la fiasta dil marcu da Glion allas 10.00 culla gruppa da sunatibas Muntanialas. Il program ei pulpius e porscha sgols cun helicopter, differents live-acts, attraziuns per affons e naturalmein era ina gronda purschida culinaria. (fmr)

SURSELVA ROMONTSCHA

Toni Vinzens sereitla

Sco quei che la Surselva Romontscha (SR) communichescha en ina circulara a sias commembras e ses commembers, sereitla il president Toni Vinzens. El ei el tschunavel onn presidial dil'organisaziun dallas Romontschas e dils Romontschs dalla Surselva. Sco quei che Toni Vinzens ha detg sin damonda dalla FMR, seigi il buordi cun presidi e sco commember dalla suprazonza dalla Lia Rumantscha (LR) memia gronds: «Per quei motiv hai jeu decidiu da sereitler sco president dalla (SR), mo da restar ella suprazonza dalla LR. Sch'enzatgi mussass denton interess pil post ella suprazonza dalla LR fuss jeu era promts da sereitler da lez e restar president dalla SR.» Las eleccziuns en quellas funcziuns han liug alla radunanza generala dalla SR ils 13 da fevrer 2027. Toni Vinzens resta denton redactur dil Calendar Romontsch. La redacziun da quel vegn procurada dalla SR, l'ediziun ei els mauns dalla Samedia. (fmr/hh)

RECLAMA

Nus luvrein per Vossa segirtad

Lingia

Tavanasa-Breil/Brigels – Trun
notgs dils 10/11 d'ost 2026 – 21/22 d'ost 2026
senza venderdi/sonda, sonda/dumengia e
dumengia/glendisdis

Manteniment dils binaris cun maschinas

Per ch'il traffic da trens vegn buca impediud durant il di, ston las lavurs urgentamein necessarias vegnir fatgas la . Nus sodein denton breigia da reducir la canera sin in minimum, Grond engraziament per Vossa capientscha.

Ils terminis indicai san sespustar sin fundament dallaura ni pervia da midadas nunprevedisas el plan da construcziun.

Ina survesta dallas lavurs da construcziun dalla Viafier retica anfeils Vus sin www.rhb.ch/bauarbeiten.

Viafier Retica
Infrastructura